

# Era istòria de Biovert

Nòm:

Grop:

## Es estudis e coneishements d'un joen li servissen tà crear en sòn pòble ua empresa diferenta e capdeuantèra.

Enric ère un mainatge qu'ajudaue a sa pair enes trabalhs deth camp. As dètz-e-ueit ans se n'anèc a estudiar Quimica, mès un còp acabada era carrèra tornèc tath sòn pòble, Corbins, dera província de Lhèida, aqui u a on s'auie criat e d'a on sauuaue rebrembes e i auie ua estima fòrça especiau.

Eth joen auie en cap un projècte ambiciós e idonèu entath sòn pòble, atau qu'en 1988 creèc era empresa Biovert. Eth nòm ei composat peth lexèma grèc bio, que signifie vida, e pera paraula vert que hè referència ath color verd deth camp e dera natura.

Biovert ei ua empresa que se dedique ara investigacion, eth desenvolopament e era produccion de fertilizants especiaus. Aquerò que la diferéncia de d'autres empreses ei era sua especializacion en nutricion de plantes. Se tracte d'ua especialitat fòrça concrèta ara quau se dediquen pòques empreses e, per aquerò, aguesta ei era sua valor principau.

Enric e era sua equipa trabalhen tà aportar ath sector agrari solucions innovadores e efectives que permeten maximizar era valor des cultius. A diari desvolòpen nauï productes que resòlven es besonhs des sòns clients.


Per exemple, elabòren productes d'origina naturau damb er objectiu de milhorar eth sòu mejançant eth reaprofitament de recorsi. D'aguesta manèra es pagesi pòden aumentar eth cultiu dera tèrra an darrèr d'an de forma sostenibla.

Actuaument investiguen coma reaprofitar era aigua qu'utilizen ena planta de Balaguèr entà netejar es reactors que produsissen es diferenti fertilizants. Com qu'aguesta aigua o residu a ua cèrta riquesa, estúdien quin tractament aplicar-li ara madeisha planta entà arténher dus objectius: per un costat, un sosproducte bon e, per aute, aigua neta que redusisque eth consum generau d'aigua laguens dera empresa.

Biovert expòrte es sòns productes per mès de trenta païsi e ei un negòci capdeuantèr en sòn sector. Mès es inicis, coma eth de fòrça empreses, non sigueren facilis, perque aueren d'afrontar diuèrses dificultats. Damb trabalh, esfòrç, compromís e resultats satisfasenti poderen superar-les e passar d'un projècte a ua companhia exitosa.

Ath delà, era capacitat d'Enric entà encuedar-se'n dera demanda de productes sostenibles e cada còp mès respectuosi damb eth miei ambient siguec fundamentau tà inaugurar aquest tipe d'empresa e hèr-la a créisher dia a dia.

Se vòs saber mès informacion sus Biovert, consulta era plana web: <http://www.manvert.com/biovert/>



## VOCABULARI E EXPRESSIONS

**Lexèma:** unitat de significacion que constituís era arraïtz o tèma d'ua familha de mots.

**Fertilizant:** producte d'origina animau o vegetau qu'a coma foncion principau aportar macronutrients (nitrogèn, fosfòr, sofre, potassi, calç, magnèsi), e es micronutrients (bòr, molibdè, clòr, hèr, manganès, zinc, coeire e niquèl) essenciaus entath creishement e desvolopament vegetau.

**Maximizar:** cercar eth maximom d'ua foncion o d'ua magnitud.

**Sostenible:** que permet era regeneracion des recorsi o deth miei.

**Demanda:** quantitat de productes o de servicis qu'un cromptador ei disposat a aquerir.

## SINONIMS

**Efectiu:** eficaç.

**Aumentar:** incrementar.

**Reaprofitar:** reutilizar.

## 1 AUEM CURIOSITAT

1. Quines paraules coneishes que comencen peth lexèma bio? Se 'ac cau, cerca-les en diccionari e hè ua lista d'entre cinc e ueit paraules.

.....

2. Quines activitats includís eth sector agrari?

.....

3. Quines accions diàries (en casa, ena escòla...) podem hèr toti tà reaprofitar es recorsi?

.....

4. Qué 'agradarie estudiar quan sigues mès gran? Perqué? Voleries trabalhar en tòn pòble o ciutat o en bèth aute lòc o país?

.....